

Són sotry Assunty so zwoprawdźił

Klarisy krušwinu z historiskim pozadkom z 13. lětstotka sadźili



Sotra Assunta přidawa pjeršč z Assisija krušwinje swjateje Klary. Za njej stejo přihladuje organizator Jan Grubert.

Foto: rl

W Budyskim klóšterku swječachu klarisy zhromadnje z franciskanami, lajkami franciskanskeje zhromadnosće a dalšimi hosćimi njewšedny swjedžeń. We wuwěšku w klóšterku stejese, zo je sobotu, 6. meje, tak mjenowany swjedžeń krušwiny swjateje Klary, na kotrymž so wotpowědny štom na klóšterskej zahrodze wosadźi.

Swjata Klara wšak je so hižo 1193 abo 1194 w Assisiju narodźila a 1253 w San Damiano zemřela. Ze zemjanstwa pochadźaca Klara je, wot swjateho Franciska (1181/82 – 1226) pohnuta, 1212 swój staršiski dom wopuščila, zo by Chrystusa w radikalnej chudobje sćehowała. Zhromadnje ze swjatym Franciskom je Klara žónsku zhromadnosć San Damiano založila.

Legenda krušwiny

Što pak ma krušwina, něhdze 800 lět pozdžišo w Budyšinje sadžena, ze swjatej Klaru činić? Legenda powěda, zo je swjata Klara krušwy rozkrała a za zymu sušila. Jedna rjadnica je so z Assisija na puč do Brixena w Južnym Tirolu podała. Jako postrow je wot swjateje

Klary kobjel z tutymu sušenymi krušwami sobu dóstała. Tamniše sotry w 1230 založenym klóštrje spóznachu w tym wosebity dar a su z počkow nowe štomiki čahnuli. Kóžde městno, na kotrymž je tajki štomik rosc móht, bě žohnowany ze žohnowanjom swjateje Klary.

Před 17 lětami

Sotra Assunta, wyška w Budyskim klóšterku, rozkladže na spočatku swjedženskeje Božej mšě 6. meje, kak je wona wotutym tola poměrnje mało znatym podawku ze štomom zhoňila. Krótko do politiskeho přewrótka, w januaru 1989, smědžeše so ze službnym wizumom Berlinskeje biskopskeje konferency raz w zapadze na zetkanju klarisow z němskorečnych klóštroch wobdželić. Tam jej sotra z Tirola wo wonaj krušwinje swjateje Klary powědaše.

„Swjata Klara, tajki štom směš nam raz darić“, je sotra Assunta w januaru 1989 zdychnyła. „Tehdy bě to iluzija. Ale přeća směš tola měć“, wuzna rjadnica tydženja w polnje wobsadźenej cyrkwi w Budyskim klóšterku.

Do centruma Europy

Dalše stawizny, kak je krušwina do Łužicy přišta, předstaji 41lětny Budyšan Jan Grubert, kotryž so w třecim rjedže swjateho Franciska w Budyšinje, ale tež po cyłej Němskej angažuje. Jemu je sotra Assunta wot tutej krušwinje a swojim sonje powědała, tajku tež raz na swoju zahrodu dóstać. A wón je so hnydom zahorić dał. Wobhoni so w ródnym měsće swjateje Klary, w Assisiju. Ale tam wo tajkej krušwinje ničo njewědžachu. Pytajo w knihach a z pomocu interneta dowě so, zo je tajka krušwina swjateje Klary w Brixenje w Južnym Tirolu. „Před třomi lětami“, tak powědaše Jan Grubert, „smy we wotewrjenym kruhu přečelow wo tym přemyslowali, hač ma to scyla zmysl, w Budyšinje tajki štom sadźić. Wšako leži Budyšin na kromje Němskeje. Potom pak smy sej prajili, zo leži tola Budyšin w centrumje Europy.“ Tuž su kontakt do Brixena nawjazali. Tamniše sotry rady próstwje wotpowědowachu. Mału krušwinu su wotpowědnje woščepili. Mjeztym je tuta šćěpjena krušwina, po kotruž su z Bu-

dyšina kónc apryla w Brixenje pobyli, drje hakle sydom lět stara. Ale w njej tča stawizny hač k swjatej Klarje.

Tež pjeršč z Assisija

Po kemšach dowjezechu sotry a dalši wěriwi młodu krušwinu kaž w procesionje na městno w zahrodze, hdžež bu sadžena. Franciskanski pater Ubald z Halberstadta požohnowa městno. Wyška Assunta přida do sadženskeje jamki hišće pjeršč z Assisija, Brixena a dalšich městnow, ke kotrymž ma klóšterk počahi, ale tež pjeršč Łužicy – z Chrósćic a Smochćic. Tež susodža klóšterka trochu dobreje pjeršće ze swojeje zahrody štomej přidachu. Přiliwala je sotra potom z Lourdeskeje wodu, a tójšto wjace „z dobrej Budyskeje wodu“.

Popoždnu přizamkny so program mjez druhim ze skupinu „Šola od 3 A“ z Libereca. Wot tam bě spěwna skupina z franciskanskim patrom Antoninom přijela. Tuta skupina je hižo dopoždna Božu mšu hudźbnje wobrubila. Spěwał je popoždnu tež serbski countertenor Stefan Nowak.

rl

✉ www.klarabaum-bautzen.de.vu